

Oqaluuserisassanut nassuiaat.

(Inatsisartut Siulittaasoqarfiat)

Siunnersuuteqartup kissaatigaa oqaluuserisassani immikkoortut 48, Kingusinnerpaamik UPA12-mi suliariumannittussarsiuussinermi misissuineramik saqqummiussinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut, paasinirlugu suliariumannittussarsiuussinerni aningaasatigut allaffissornikkullu sipaartoqarsinnaanersoq, suliani ullumikkut Namminersorlutik Oqartussanit aamma Namminersorlutik Oqartussat suliffiutaannit ingerlanneqartartuni. Misissuinerami aamma siunertaassaaq suliat pisortanit ingerlanneqartartut sorliit namminersortunut imissutigineqartarsinnaanersut nassuiarnissaat tikkuarnissaallu aamma sipaarutaasinnaasut taggillugit taamaasilluni suliat ukiup tullianut aningaasanut inatsisissamut ilanngunneqarsinnaalersillugu, imm. 49, Nuummi, Sisimiuni Ilulissanilu ivigaasanik qallikkanik arsaattarfiliornissap pilersaarusionerqarnissaanut 2012-mi Aningaasanut inatsisissatut siunnersuummi aningaasanik immikkoortitsinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut, kiisalu imm. 51-ip, 2012-mi Aningaasanut inatsisissatut siunnersuutip suliarineqarneranut atatillugu inuussutissarsiutigalugu piniartut ukiumut akileraaruteqaataasussanik 150.000 koruunit ataallugit isertitaqartartut allanut ilinniarteqqinnissaannut atugassanik aningaasaleeqqullugit, taakkua annertunerusumik inuutissarsiutinut allanut isertitaqarfinnerusinnaasunut ikaarsaariarsinnaalersillugit, Naalakkersuisut peqquneqarnissaannik Inatsisartut aalajangiiffigisassaattut siunnersuut, marsip ulluisa 16-ianni siullermeerneqartussaagaluartut napparsimaneq pissutigalugu ataatsimiinnermi kingusinnerusumut nuunneqassasut.

Immikkoortut pineqartut suliarineqarfissaattut maanna siunnersuutigineqarput: Imm 48, siullermeerneqassaaq 23. marts, 13. april aappassaaneerneqarluni, imm. 49 aamma imm. 51, siullermeerneqassapput 24. marts, 13. april aappassaaneerneqarlutik.

Peqqissutsimut Ataatsimiititaliap kissaatigaa oqaluuserisassani imm. 67-ip, Kalaallit Kalaallit Nunaanni peqqissarneqarsinnaannginnertik pissutigalugu Brønshøjimi Rigshospitalimilu peqqissarlutik ungingasut kalaaliminernik nerisaqartarnissaat qulakkeerniarlugu ukiumut 200.000 kr.-inik nunatta karsianiit aningaasanik immikkoortitsisalernissaq pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut, aappassaaneerneqarnissaa marsip ulluisa 24-iannit UKA11-mut kinguartinneqassasoq.

Sapaatip akunnera kingulleq akunneq naalakkersuisunut apeqquteqarfiusinnaasoq

ingerlanneqanngimmat, sapaatip akunnera una pingasunngornerup saniatigut aamma sisamanngorpat naalackersuisunut apeqquetoqartoqarsinnaassaaq. Naalackersuisunut ilaasortat kikkut aperineqarsinnaanerannut takussutissiaq ilaasortanut nassiunneqareerpoq.

Taasisarnerit eqqarsaatigalugit piffissami marsip ulluisa 15-ianniit marsip ulluisa 18-iannut Inatsisartunut ilaasortat Akitsinnguaq Olsen, Siumut aamma Juliane Henningsen, Inuit Ataqatigiit, kiisalu piffissami marsip ulluisa 15-ianniit 16-iannut ilaasortat Kim Kielsen, Siumut aamma Debora Kleist, Inuit Ataqatigiit, Siverth K. Heilmann, Atassut aamma Kuupik Kleist, Inuit Ataqatigiit taamatuttaaqq ullumi ataatsimiinneq eqqarsaatigalugu Hans Enoksen, Siumut aamma Niels Thomsen, Demokraatit isumaqatigiissuteqarput.